

茶銅鐵爲巨擘機器奇巧不過輔之以行而要非正宗蜀地重慶早關商場將來軌路大通成都將列爲巨埠昔之險塞今類康莊若不早爲圖謀誠恐門戶一開漏卮轉甚況蜀民人口甲於二十一省生齒日繁游民日衆尤宜廣興各項實業以彌隱患而裕民生時利家世蜀人聞見較確謹貢芻蕘以冀採擇現在 朝廷設立商部百度維新蜀中商人咸知奮勉呈請代奏懇 恩飭下四川督臣設法極力整頓以蘇民困而濬利源等情前來理合恭摺具陳代奏謹 奏

翰林院撰文吳奏罪犯習藝所新章請責成各省府州縣一律分設摺

竊臣三月二十一日伏讀 上諭伍廷芳沈家本奏議恤庶獄各條業經依議惟立法期於盡善徒法不能自行全在大小各官任事實心用副 朝廷省刑之至意等因欽此仰見聖朝矜恤庶獄有加無已薄海臣民同聲感頌查伍廷芳等原奏凡竊盜皆令收所習藝按罪輕重定以年限俾一技能嫻得以餬口自少再犯三犯之人與京師五城教養局現行章程略同五城教養局係前山西道御史夏敦復及上年 奏定創設五城科道經理之教養之法分粗淺工藝十五科皆擇日用常物一人能作者成本輕則銷流自易藝成遣散能自謀生其宗旨在化導頑民與工藝局有別也所成之物出售後應得餘利按成酌提歸內餘

則存局於遣散日俾作贖本法良意美年來收養罪犯日多內外城竊案漸少明效有如此者臣查罪犯習藝所前經刑部分咨各省議令通設近年各省摺報辦法不一直隸於保定天津各設一所雲南則省城專設一所大抵偏重省城限於經費不能徧及惟山東河南兩省議由州縣分設因地制宜一律開辦已先後陳奏咨部或謂府州縣徧設惟所慮經費不給奈何夫經費有二曰開辦曰常年臣約略計之如直隸一省督臣袁世凱所陳辦法保定天津兩所共容八百人經始爲難籌費過鉅若以此八百人分養於府州縣每縣不過數十人少或十數人開辦之費建廠屋招藝匠派丁役以佐貳哨弁領之如本地向有官房或善堂酌量擴充籌款試辦事尙易舉常年之費似可援山東直隸章程按缺分優劣攤之卽以攤款作設所後經費且部行新章軍流徒犯均令收所凡遞解寄監等費可挹彼注茲行之一二年後成物出售及一切罰錢併陸續酌貼內用但使地方官經理得人實事求是天下甘心爲竊盜者究亦無人化莠爲良當可十得其八合無籲懇天恩俯念化莠勸工立法無弊飭下各督撫責成所屬府州縣限三年內各設習藝所仿山東河南章程並參用直隸攤款辦法各令切實舉行天下一律謹奏奉 上諭翰林院撰文吳蔭培奏罪犯習藝所新章請責成各省府州縣一律分設一摺著各直省督撫飭所屬一體認真辦理原摺

著抄給閱看將此各諭令知之欽此

墾務大臣綏遠城將軍貽奏擬請變通杭錦旗墾地原定租章摺

竊杭錦報墾蒙地前經奴才將該旗願徵押荒請領部照並擬定押荒歲租等則仍須親赴後套履勘詳酌各情形先後查明在案旋於三月二十七日攜印起程行抵包頭墾局將應行及時籌辦事件趕緊布置隨即赴套逐日經過地方所有熟地荒地幹渠枝渠無不逐加考察凡地形之高下土脈之肥磽渠水之遠近熟審而默識之歸途行過希尼眼時適該貝子阿爾賓巴雅爾已先期到彼候商渠地各租事宜始知前定押荒歲租數目有亟宜加以變通者查奴才原定租章上地每畝收押荒銀九錢中地八錢下地七錢除提二成充開渠經費外餘則以一半歸公一半歸該旗歲租上地每年徵銀四分五釐中地四分下地三分五釐無論上中下均各提出二成以備修渠之用當時係據局員具稟先行酌擬及此次周歷各渠因流溯源皆已得其要領綜計杭錦地勢狼山峙其北黃河互其南地居中央引河爲渠導以就地由南北節節漸高激之使行疏之使注而揆諸就下之性則施功非易而墾闕尤所宜防加以河水灌輸沙泥俱下有時上游水驟下游沙淤倒退其狂瀾動至決隄爲患故從前農民開渠之家渠身必每歲刷之使深渠背必每歲培之使厚其所以費資甚鉅